
ЎЗБЕКИСТОН ВА ҚИРҒИЗИСТОН РАҲБАРЛАРИНИНГ ЮКСАК СИЁСИЙ ИРОДАСИ ТУФАЙЛИ СЎХ-РИШТОН ЙЎЛИ ҚАЙТА ОЧИЛДИ

Сўнгги йилларда давлатимиз раҳбарининг сиёсий иродаси ва янги Ўзбекистоннинг халқаро сиёсатдаги эзгу ташаббуслари туфайли азалдан тили ва дини бир, анъаналари ва урф-одатлари муштарак қардош қўшни давлатлар билан муносабатларимиз илгари тасаввур қилиб бўлмайдиган даражада мустаҳкамланмоқда.

Бугун Фарғона вилояти ва Қирғизистоннинг Баткен вилоятлари орасида Риштон” (“Қайтпас”) ва “Тул” (“Этикчи”) чегара постлари тантанали маросим билан ишга туширилиб, Қирғизистон орқали ўтган Сўх-Риштон йўли қайта очилгани ҳам ана шу эзгу ишларнинг яна бир ёрқин мисоли бўлди.

Фарғона вилояти ҳокими Хайрулло Бозоров ва Баткен вилояти губернатори Омурбек Суваналиев иштирокида ўтказилган очилиш тадбирида икки вилоятнинг турли соҳалари раҳбарлари, кенг жамоатчилик вакиллари ва ОАВ ходимлари иштирок этдилар.

Тадбир айниқса, 80 мингга яқин аҳолиси бўлган анклав ҳудуддаги сўхликлар учун чинакам шодиёнага айланди. Чунки, вилоят марказига келиш учун 80 км йўл босиб, Фарғона туманидаги “Водил” божхона чегара пости орқали қатнаган юртдошларимиз энди қисқа, 19 километрлик йўлдан эркин фойдаланиш имконига эга бўлдилар.

Дастлаб Риштон” (“Қайтпас”) чегара постида карнай-сурнай садолари янграб, икки томон вакиллари бир бировларини очиқ юз билан қарши олдилар.

Маросимда сўз олганлар томонидан давлатларимиз раҳбарларининг ташаббуслари ва амалий сайъ-ҳаракатлари билан Ўзбекистон ва Қирғизистон ўртасида алоқалар кенгайиб бораётгани, чегараолди ҳудудларнинг ҳамкорлиги ҳам янги босқичга кўтарилаётганлиги таъкидланди ва Президентларга чин қалбдан миннатдорчилик изҳор этилди.

“Бугун тарихий сана. Икки қўшни мамлакатлар аҳолиси азал-азалдан қон-қариндош, аҳил-иттифоқ яшаб келган бўлса-да, Сўх туманига Боткен орқали ўтадиган йўлни очиш масаласи қарийб 10 йилдан буён халқларимиз орзуси эди. Икки давлат Президентлари, ҳурматли Шавкат Мирзиёев ҳамда Садир Жапаровларнинг Тошкент шаҳрида бўлиб ўтган 11-12 март кунларидаги олий даражадаги учрашувларида эришилган келишувлар ижросининг тез ва қисқа муддатда гувоҳи бўлиб турибмиз. Икки давлат раҳбарларининг сиёсий, қатъий иродаси туфайли бугун мана шу йўл очилляпти. Ўйлайманки, бу воқеълик барча соҳалардаги алоқаларимизни мустаҳкамлайди. Президентимизнинг олдимизга қўйган катта вазифаларини амалга ошириш учун имкониятлар яратади. Шунини айтиш керакки, Қирғизистон Фарғона вилоятининг энг яқин савдо ҳамкори ҳисобланади. Катта режаларни қиялпмиз. Фарғона-Боткен вилоятларини ўзбек-қирғиз муносабатларида энг намунали ҳудудга айлантиришга ваъда берамиз”, - деди вилоят ҳокими Хайрулло Бозоров.

Тантанали тадбирлар Сўх ва Қирғизистонни боғлаб турувчи “Тул” (“Этикчи”) ўтказиш пунктида ҳам давом этди. Бу ерда ҳам табрик ва қутловлар янгради. Шу ерда Фарғона ва Боткен вилоятлари раҳбарлари бир бирларига эсдалик совғаларини бердилар.

Дўстлик, ҳамкорлик абадий бўлиши учун тилаклар билдирилиб, дуолар қилинди.

Бизни ижтимоий тармоқларда кузатинг Facebook,
2021-04-02 11:45:27